

# 黃渡鎮志卷六

里人章樹福清甫氏纂輯

人物

鄉達

元

任仁發字大珪一字子明號月山人年十八中鄉試元兵南下平章游某見而器之委以招安海島爲青龍水陸巡警官屢遷貳都水監時大都通惠河隱楊開奔決會通河淺澀汴梁黃河決浸歸德杭之鹽官海塘崩陷鎮江練河及府境澱山湖吳淞江淤塞凡水議皆仁發主之具有績效出知崇明加江陰尹民立祠祀之字學李邕又善繪事嘗奉旨畫渥洼大馬圖龍賚優加後以中憲大夫浙東道宣慰副使致仕築來青樓覽輝閣于青龍江終老焉

明王逢謁任公墓詩後序予避地青龍聞遺老言東盡又圻浦皆葭菼茅篠居氓十餘家曰弋水禽野雉爲業公產是閒輒異羣兒習負笈力學年十八第郡試既冠宋革命袖一刺見游平章辟宣慰椽繼省授青龍邏官俘蟠龍寺作耗者盡釋脅從至元二十五年擢海道副

黃渡鎮志

卷六

四十七

千戶以功轉正千戶會征交趾改海船上千戶是年浙西淫潦建言河沙匯乃吳淞咽喉不先此而他濬罔效大臣不納後果湮塞大德七年重濬平章閻里起公督七十餘里萬畝畝之役井然有條率人覲成宗賚勞有差進都水監丞至大元年除同知嘉興又明年遷中尙院判官適大都通惠河閘底鑽木汎湧流覆舟謫傳有怪物中書檄公不兼旬繕完會通梗澀復窳泉眼鑿僵沙舟楫以達陞都水少監河決汴梁溢人歸德府治公結籬篠鳳埽實河口築隄五百餘里以扞橫流編戶奠甯延祐三年出知崇明修學闡教民胥興行至治二年鹽官海激岸崩鎮江練湖淤積並命公治海岸以固邦賦無阻泰定改元詔賜銀幣興行省朶班左丞部六郡夫疏導吳淞二道大盈烏泥二河事竣加江陰尹以七袞聞上不聽特任都水庸田使司副使計砌石閘六築塍圍八千浚溝汊千有奇太湖衆水東入于海四年鹽官海荐爲害公一如制河決用再帖安以中憲大夫浙東道宣慰使司副使致仕壽七十三卒所著水利書具存尤善畫其熙春天馬二圖仁宗詔藏祕監其先本徐邳三山人考珣贈高郵知府妣夏妻高並贈樂安郡君子姓多致通顯曰賢明精竇太師鍼炳至正初學士揭傒斯引見上欲官之辭歸監丞陳旅送以序曰賢佐由蔭纂官台州判官階從五品遭亂遂

遠引相知予久長兒掖實娶台州女歿而自烏涇往祭就謁宣慰公墓宣慰孫璞字伯璋賢佐子嘗割田二頃贍青龍鎮學中年謝軍職迨世變一褐畝廬義不去圻上因示墓碑乃錄其概于詩後以歸之

王昶蒲褐山房詩話少監雖工行水而文采爲世所推錢塘白廷玉斑贈詩云傾蓋相逢意已親風流儒雅邁同倫曾來東閣觀奇士又向西湖見偉人放櫂小谿梅的的敲棊深院酒鱗鱗懸知後夜相懷切帆落胥山月一輪又楊鐵崕維禎題月山公九馬圖卷云任公一生多馬癖松雪畫馬稱同時已知筆意有獨得天育萬騎皆吾師房精夜墮池水黑龍出池中飛霹靂圖中九馬氣俱王都護青驄尤第一一馬飲水水有聲兩馬齧草風雨生其餘五馬盡奇骨蠻煙洗盡桃花明君不見佛郎獻馬七度洋朝發流沙夕明光任公承旨寫神駿妙筆不數江都王任公一化那可復後生畫馬空多肉此圖此馬無人看黃金臺高春草綠案青浦志載仁發居青龍王逢序謂產艾祁又云宣慰孫璞遭世變不去圻上今訪其嗣猶有居此者余家曾購任氏田在艾祁西田間遺石柱二云是當時亭材則來青樓諸勝想亦去此不遠又鎮南有任巷其東爲任家橋所居皆有仁發裔蓋王序所錄祇二子而別有可

## 黃渡鎮志

### 卷六

### 四十八

攷者曰賢材由秘書監遷考城令曰賢能字叔達官涇令賢材子暉字東白善賦詩與楊維禎交曰賢德與其子士質嘗修隆福寺金塔子姓繁衍惜無世譜證別其支派也

明

金。河字文泳號四愚洪武時荊州教授義之曾孫也景泰七年舉于鄉天順間乙榜授山東茌平縣知縣丁父憂歸服闋補壽張縣知縣居官清正以慈愛御下卒以忤上官罷職始家膠城自去官後其孫炤移居黃渡築室箬園涇上樹梅百本迎養來鄉迨至歎曰安身爲樂無憂爲福與其碌碌榮華豈若守顏氏之簞瓢原憲之蓬戶清曠耳目自適哉遂不出嘗自題像贊曰形肖晏子而智之弗如學宗孔子而愚不可移進慕卓魯之政而弗及退處顏子之樂而有餘斯人也古則仿佛乎天民今則俗呼爲迂儒者歟炤字繼德事祖父以孝稱

徐博字德宏號竹居與弟忬

龔宏嘉定志作兄

同舉于鄉登成化丙戌進士知湘鄉縣天順間擢監察

御史巡視兩淮河道及期代者且至博自以省親歸爲言官所劾左遷樂陵縣知縣改知巴東得心疾乞歸爲人豪邁善草書詩與松江張弼相伯仲有竹居集

案程國棟嘉定志載家居西郊吳桓志謂博宅在孩兒橋一在黃渡鎮或云在今鱗姚二圖

之曹家邨又攷龐氏家乘有娶同里徐御史姪女則博爲里人當信

國朝

王原初名深字令詒號學庵晚號西亭父夢求字九徵從桑浦邨移居梁紇渡入青浦籍以歲貢考選教諭端和不矜才入幾社爲陳子龍夏允彝所推原康熙乙丑選貢丁卯戊辰聯捷舉進士初仕選廣東茂名縣知縣嫉里長私派民糧清釐業戶設法代償逋糧逃戶悉歸鬻子女妻妾者招集成市嚴禁之建義學斥巫覡鋤強梁雪冤殫頒婚葬之式久之頌聲大作以解犯逃脫解任未幾弋獲復官補貴州銅仁縣知縣教民造舟輿販治葛爲布焙茶榨油以便民用設苗寨長貳以約束羣苗復練鄉勇爲備邑大治行取人都授工科給事中時以馬思贊請天下錢糧加一火耗作爲正供 聖祖問州縣之爲科道者原奏言不可 上是之議遂革尋劾文選司郎中陳汝弼貪姦狀得實而原亦因王自修疏論王煥王式丹事牽連降級歸以品學見推當世踵門求文者曰不暇給俱欲得一言爲重其以進士需次時崑山徐尚書乾學聘修一統志于洞庭山又嘗受學于平湖陸清獻公案原受學清獻在館 虞山時見陸子年譜及睢陽湯文正公至老闡發理學尤精著述繁富年八十四卒

黃渡鎮志

卷六

四十九

黃張美憶王九徵作憶昔聯牀共寢興春風搖落事難憑誰堪作賦依劉表浪說登舟附李膺望裏谿雲連絳帳愁來夜雨獨青燈更憐玉樹談經處一夕攜尊話未能

王士正送令詒之官銅仁乍返扶筇權還乘楚水槎人如訪句漏地自足丹砂蠻俗猶輸布徵書定及瓜誰歌沉有泚離思滿天涯

湯右曾送王令詒之銅仁之官鳥道外叢木子規嗥人物餘三戶雲山入五谿秋風沉水上明月夜郎西旅雁稀消息全家好共携 又送令詒歸松江去國名何減還山意有餘未成三畝隱且傍九峯居鄉物傳鱸膾門生議蟹胥他時小兒子看讀五車書

王昶曰西亭先生毀齒即辨四聲能五七言句及長斥陳李詩爲俳優與查初白兄弟專倣宋人會試出徐尚書健庵門下受業于王尚書阮亭又從陸清獻湯文正講道學一時賢士大夫爭相推許之與朱竹垞檢討有同過白雲寺分韻又同作苦熱聯句宋牧仲瑩吳元朗璟魏禹平坤趙蒙泉俞酬唱尤夥其爲名流傾賞如此所撰有學庵類稿九十二卷然歿後聲名翳如無有知其詩者沈歸愚尚書選 國朝詩別裁多至九百餘家先生不獲與焉仰屋著書誰傳此者古人所由悼歎也

陸祖庚字鵬年號補堂少從黃焯巖壩游有文譽入資補福建浦城縣丞明習吏事閩中丞貳膺薦擢者例先調臺祖庚以卓異得鳳山縣丞丞署駐阿里港倚山負海地最扼要甫蒞任姦民王教滋事募驍勇竭力堵禦俟軍集環甲出擊一舉除首逆事平請于上官撫卹生熟諸番嚴查海澨諸禁各見施行惠潮漳泉諸郡貿易者始畏法海疆俸滿擢知南平縣爬搜積弊整頓窳惰不期月而政成丁父憂歸年六十卒于家居恆布衣徒步不立崖岸性伉直不能容人過後進憚之家素封宦遊廿年產無存者閩人至今稱清白吏云

金燾初名時燮字葆和號竹莊河十一世孫乾隆庚子舉于鄉庚戌試禮部以薦卷取中書是科尙書彭元瑞建議停止錄用名遂削乙卯大挑以知縣之官山東初判曹州改署泗水縣會匪類聚葛仙洞剽掠財物婦女重爲民害燾至急帶兵役追捕盜立遁民間佃種泉地被鄰境侵占構訟不休有勾通藩撫吏胥爲姦清覈土著按戶給憑姦民斂手逾年調攝魚臺金鄉兩縣篆屬境苦蝗上官委員以督捕索供億燾不應已蝗淨獲上稔尋知即墨縣邑有狼患爲文禱于勞山麓之童恢廟狼孽漸戢民德其誠居官率情任事以詭隨時俗爲恥因劾同縣教諭王淦行止卑鄙反爲王螫奏人以同官互訐論罷士諭惜之踰年歿于濟南館舍年五十四自

## 黃渡鎮志

### 卷六

五十

少不事生計每歲除債家林立門外但聞戶內讀書聲各逡巡而退歿後宦囊蕭然賴同寮飲助得扶櫬歸

金襄字式玉號岷山又號麓邨弱冠與兄鈺同工制義婁東院長毛詠以雙金目之乾隆戊子登鄉薦辛丑成進士以知縣用改選江甯府教授約束諸生以道督飭義學勸舉卹整事協贊中山遺墅爲浦方伯奉茲李太守堯棟所倚重性介不泛交同時嘉善浦銑桐城姚鼐各主講席在郡招同寢處相究切性命之旨閒從清涼寺僧展修上達爲方外交論安養法門欣然有得案頭惟置大全集近思錄諸書丁繼母憂歸優游市南之陸家圩服闋補鳳陽府教授以病辭主講平江敬業兩書院子鳳藻自有傳

### 孝友

明

龐廣字孟智號耕樂世居卜家灣父德剛以北運之京途卒廣少有智略讀書穎悟年十六匍匐數千里扶父喪歸承父職掌鄉稅者三十六年燭決籌策不爲豪右欺羣弟請代弗許周文襄撫吳時深加賞識晚年以積勞免役手撰祭文告廟逍遙吟詠以終

明代徭役曰糧長每區一人專督本區賦稅曰里長每圖一人按甲輪充一百十戶爲里里分十甲責催本圖民戶本折銀米曰老人每里一人督官戶稅糧蓋官民戶分爲一甲也曰塘長每區一人督率人夫修本區水利田圍曰總甲每甲一人訊察逃盜爭鬪之事惟簽點糧長必殷實之戶稅多者萬石少者數千石部輸八京

龐應龍字子神號魯齋嘉靖間諸生父錦爲兄復讐被法應龍率弟應鳳周旋艱險卒脫父于重辟志存經世以嘉定西南區土瘠民困訴之上官爲奏減額每畝七升歲復倚閭秋稅五千斛土著以安旣鄰郡吏以捕亡有忤詆應龍前訴越職遂落學籍

周賓禮字元馭號行之同母兄弟三人惟賓禮業賈竭其資以供兄弟讀書每夕治茶湯進恆從壁間伺聞呻吟聲欣然厭意以去旣老以私財均授之兄弟無吝色有子五以諸生世其家李士璋字孟圭父應鸞以勤儉饒于資宗禎末邑令飭應鸞充運糧民例領官錢出糶以供令下三日吏促之行應鸞計未決士璋言于衆曰道路梗塞此行非丁壯不勝親老矣諸弟未成立是我之責也遂詣縣代父役令歎而遣之官錢不足稱貸以充額事訖恐戚父心終不言所負

## 黃渡鎮志

### 卷六

五十一

永樂間從陳瑄議令民運糧俱于淮安瓜洲補給脚費兌與軍船領運後令糧里自備船隻運赴通州成化時罷瓜淮兌運官軍雇船于江南水次交兌民加過江費至萬歷九年復將蘇松常嘉湖五府應運白糧簽點糧長春辦解京漕糧則係軍運 國朝順治四年以糧長輸解白糧受累改爲官運猶用民船至康熙十四年始分于漕船帶運

## 國朝

張佐廷業農居張家邨父以仇家誣引坐繫佐廷年十三痛父冤時值濬吳淞巡撫馬祐閱工過境自橋奮身投江呼籲求豁父罪巡撫以年少異之提案覆訊事得白

金垓應昌嗣子母龐早寡撫養無乳餉以餒餌及長事母至孝母疾躬親湯藥自滌穢汚母歿哀毀骨立廬墓二年康熙二十四年邑令聞在上以一門節孝旌其居

張正源自諸翟之石皮術遷居黃渡康熙乙未母病革割股置糜以進病立愈汪存夜輯紫隄志以正源寓居他所遺之

後夢一婦持片紙書姓名曰聞君作邨志吾兒事盍附入爲幸汪覺而悟其失吳廷瑜字光周居南鎮業貿布割股療母施疾龐泰字魯瞻居

北街割股療父瀚疾皆康熙時人楊若霖居北場術割股療母陸疾楊嘉玉居楊家邨割股療母王疾皆乾隆時人

陳兆楨字翼滄號君軒諸生弟濟客粵東二十年感念手足時形諸吟詠如寒食謁兄嫂墓秋  
日懷剡之弟諸作語語真摯令人不能卒讀性恬適和陶句云余固好閒靜敢薄聲名喧喧寂  
各隨遇戒之黨且偏馳車趨北闕攜屐歸東山道路孰夷險惟人慎往還時哉山梁雉聖教在  
一言

金用臧字與由兄用行弟用英同居鹽鐵塘鄰邨以穡事修隙羣譟其門家人叢手攻之斃一  
命無主使者用臧知不免獨身任之兄若弟感其義交相趨而卒坐用臧受大杖足脛幾折上  
察其情曲示寬典以僕杜端林代繫得釋歸則斧資半喪矣兄弟以所餘讓用臧峻卻之合力  
拮据數年而復其業乾隆六年邑令朱爾介給敦睦可風額里中子姓蕃衍今首稱金氏云

嚴勤曰吾友與由金君臨難不避臨財不私剝膚不言苦業成不矜功自非天性真摯懸淡  
于家庭骨肉間而能然乎

錢士宏字文佩居陸皎浦家貧每炊別具布袋盛白菜以奉母傭工得錢必節其餘以畜鷄豕  
歲無缺旨妻嘗言當令羣季分任親膳士宏怒斥之遂不復敢言

錢鏡明字駕二廩膳生少穎悟力學砥行爲里中師表從遊者以百計自其先爲庠序生至鏡

## 黃渡鎮志

### 卷六

五十二

明己十七世母張守節撫孤以館穀所入養母必豐腆自奉敝衣麤飯晏如也晚年督子奉養  
亦無怨容謂其友曰我非過峻也無壞家法耳聞者欽服

章沾恩字沐天號石如性醇謹然諾取與一毫無苟與弟沾露同食遞衣白首無閒家庭融融  
課兒姪終歲不輟絃誦聲夜則挈弟聚一室論述古今藹然相得也晚年溫經不釋手讀文選  
日背誦如童時勤錄先儒注疏蠅頭細書傳爲塾課善本領道光乙酉鄉薦注選知縣未及官

卒  
金乃銘  
填諱

義烈

明

龐大有字橫江剛慧多力嘉靖間倭寇掠黃渡與之鬪不勝受執賊愛其勇脅令從行踰時賊  
復至大有與焉會渴甚衆汲水就桶恣飲乃出不意擊之斷數倭頭馳報縣令令疑其冒賞責  
令納輒修城遂歸設窰購材以竣嚴工歿即葬于窰墩側同時有泥岡邨張某以禦倭死

倭奴皆薩摩州人實由漳泉甯紹之民勾引爲亂而首導之者徽人汪直杭州虎跑寺僧徐  
海是時江南武備廢弛多徵調客兵如廣西狼兵田州瓦氏兵山東少林僧兵雖勇悍不熟

路徑且難節制重臣趙文華等撫馭乖方任賊散掠自嘉靖三十一年至三十八年始絕東南之民魚爛矣

龐偉字子千自幼博聞強識受學于顧在書際明崇禎乙亥年十七補博士弟子素有大志仗義疎財時闖賊陷燕京福王繼統南都有開瞿山之舉偉獻策得旨擢佐軍謀既入嫉國事不可爲以母老辭東歸 王師徇地至吳鄉兵四起密與友曹來初詣縣請兵靖亂爲賊顧滿三戕于方泰北煙墩下從者歸告家人令速走偉妻徐曰夫已殉難尙何生爲因出僕婢數人閉門痛哭賊至與子恒文仙四人俱被焚死

龐瀚贊嗚呼子千青青子衿一腔熱血爲國喪身志長戈短難挽暉沈慘遭賊亂殺身成仁滿門忠烈投焰爲燼英風燿燿浩氣常存惜哉痛哉青史罔聞紀之示後知有哲人

龐俊字人表明季吳中流寇擾害偕仲兄佺避亂于嘉善陸氏時華亭張肯堂巡撫福建唐王入閩肯堂出募舟師由海道趨江南勅結義旅嘉善人原任蘇松兵備副使錢某素知俊以名上爲巡撫標下遊擊領兵護嘉善城手刃姦細屢著功績 王師破嘉善隨錢招撫敗兵赴閩入衛以事檄往嘉善中途疽發卒

### 黃渡鎮志

#### 卷六

五十二

#### 卓行

明

龐時行字伯達萬歷間諸生以樸學真行爲當世推崑山徐贈公延之課二子開法開緒賓禮優至久敬如一日 國朝康熙初開法子元文以翰撰歸省奉父命訪謁師門而時行寒素如故略具鷄黍元文憐其貧欲挈之行以老病辭劇談終日而別士論賢之子眉

國朝

眉字樞白好讀書廉介有志節父時行歷館公卿家眉不以家貧干瀆故舊嘗語人曰儻來之物終歸烏有徒失我品素耳平居豪飲善弈與同里金九式友善九式子枝有文譽求眉幼女爲婚眉曰盍以某卜如直和局則天作合也兩梓迭對果無勝負遂締婚其曠達類如此

浦鷗字浪臣一字居洲其先崑山人遷黃渡之陶祁負氣寡兀論古今成敗得失張目抵掌聲振林木中年始學詩筆力豪放入東岡詩社葺臨江小閣于陶祁之濱躬耕食力暇即手一編朗吟不輟室中置木榻日焚香端坐讀易其中嘗指櫺語妻子曰生以此貯琴書死以此作斂具當湖陸清獻公歿鷗攜吳淞之第六泉走謁其門酌水儀牀而哭之曰明府泣嘉定止飲民

閒勺水敢爲公奠晚自號勞安子吳莊爲作勞安子傳年六十七卒女弟鷺子波臣從孫鯤字  
崙發號存吾皆能詩

吳康侯贈浪臣瀟灑漁翁一釣鉤西風木落滿江秋我來若訪元真子只在吳淞煙水頭

陳邁贈浦浪臣因傷世路日多歧獨把耰鋤淞水湄倚醉夜成鷗鳥賦樂飢秋詠梵瓜詩春  
申渡近潮回早陶令籬荒菊放遲正喜輟耕嘉客至綠藤陰下坐彈棊

吳莊安蔬齋詩序云我膠有真隱三莊子宴如真經濟而隱于卜浦子浪臣真意氣而隱于  
農張子西又真學問而隱于酒予與三子者遊如飲醇自醉焉

汪存夜曰浪臣買宅陶祁兼闢小園雜栽梅杏藉吟飲爲樂時訪故舊杯酒甌茶相與歡洽  
每夏園果垂林輒邀賓顧其家從枝間摘果餉客多不過五六枚手製道品色味雙絕設罍  
酬客則家釀及尊鼓等甕咸在堂隅每倒一壺必手自挹注至庖所煖之乃行觴不盡歡即  
止客或伺入內盜取壁間酒并自探甕頭諸品引滿豪飲相顧失笑盡酣而散主人固不覺  
也翌日乃悟曰昨請嘗鹽鼓公等碌碌並效畢吏部耶其樸率如此

范逸初名述字亦緒幼受學于同里龐瀚生當鼎革不樂仕進旣長更今名字遺民號芥軒與

## 黃渡鎮志

### 卷六

#### 五十四

族兄超各以詩文相尚而苦思沈詣過之有黃谿二范之目

舊志謂二范不同族者  
非詳見吳廷選友龍集

少時父令守肆

挾書吟誦或盜肆中物不覺也家貧無一塵授徒槎谿十年衣食不繼恒藉醫自給年五十五

兩目忽瞽

練音集注年未五十而  
瞽非邑志文學傳亦誤

嗣喪妻及長子貧益甚猶爲童子師口授詩書無譌舛胸儲釋部

千餘卷晚益研心笠典閣中而肆一歸真實故能言言見諦和元僧山居詩四十首皆從性情  
流出雖飢寒切身而自有悠然處也所與交如虞陽唐瑀由拳茅籓玉峯徐杏輔婁東李嬰錫  
山王金孺天都柯烝雲間沈白王顥及同邑李燧趙楫江楷俞嘉客輩皆安貧守賤之士詩宗  
唐人格律蒼老所居有勸影樓終日吟詠不輟旣自編芥軒詩存初二集復屬友人編盲廢後  
所作爲四餘詩草卒年七十二子鈞弟暹字方曉從子宗彪字秉時宗懿字秉是逸詩賴宗彪  
宗懿收拾而存

張僧乙贈范芥軒芥軒先生天下士一椽小結江之涘掛瓢洗耳各有人大隱何嘗不在市  
寤寐爲勞二十春蒹葭秋水想伊人文章有神交有道應識天涯若比鄰吾來江上溯芳蹟  
相逢示我連城壁八尺珊瑚千百枝明珠論斗光的皜先生才品世莫儔奇書一卷足風流  
一唱二歎不盡意歡傲直欲凌滄洲

夏時中慰芥軒喪明作芥軒道人少也賤放眼詩書破萬卷昭昭正僞白黑分雜然紛錯詎爲眩下筆千言覺有神縱橫風雅辭流便苦節蓬蒿五十年一寒至此誰推薦吁嗟天復喪其明忌君八斗才獨擅堅光煥南金青筠美東箭盤錯歷冰霜爐冶經百鍊白日明窗簡冊陳兩手摸索不復見故人相對熟聞名執手猶能記顏面俗輩咸相嗤交遊情亦變桃李榮春花誰奉先生饌寒窗兀坐思悠然開口吐奇驚時彥抗懷古人意飛動假日童子讀文選倚枕敲詩得奇句狂呼起舞輕欲旋銜杯清夜對知己險韻拈將恣酣戰折得梅難具冷香簾幙春深聽語燕濯足微風拂素襟踏月依稀色如練暇時與之言契洽劇歡忭論列昔與今疊疊不少倦朗聲誦詩文一過記略遍爲我別妍醜暗室秋毫見噫嘻君才大如椽君目

明如電

陸明字令融家南鄉晚徙青龍

芥軒詩存有和令融移居龍江原龍青浦詩傳謂居白鶴江疑誤

天性磊落不屑治生產傾資結客放

意詩酒貧不謀朝夕袁載錫謂其酒酣得句伸紙疾書胸中浩落不以貧故動其心由此進之入道不難

童士鶚字振臺號惺庵歲貢生植品方正終日把卷不知有人世事一日士鶚壽弟子咸具酒

黃渡鎮志

卷六

五十五

脯詩文爲視受詩文而返酒脯翌日邀集門下士乃悉具衣冠入座良久命子以菘豆羹湯進曰寒士酬賓取辦于籬落間足矣平生古道照人類然

黃大成字孔集號藥亭父世基由天都遷黃渡所爲詩清穩拔俗王輔銘採人練音集世基歿大成顏父所居曰思詠樓徵詩紀事彙而刻之弱冠遊都下結納儕輩揮金無少吝施孝廉洞春往謁之旅舍適值寒食見大成啟木櫝奉主列几而祭皆其平日所知之士客死京邸者陶耕書字起雲號耘史諸生居王家涇僮不羈博覽羣史喜談刑政之學優蹇不遇人有賙之者拒弗納嘗于朋輩大言曰末士不知廉恥輒干乞以爲生所謂小人懷惠其極至于不可言聞者咸笑其狂答曰百年而後當有謂耕書不狂者其豪致至老不減

文學

明

龐應鳳字子儀號梧岡應龍弟萬歷五年歲貢己卯舉順天鄉試授滁州學正在官六年樂與滁人士遊醉翁亭文酒歡會賦詩自得課士有法程于單寒尤加意天植真摯內行淳備一如其兄其卒也徐尚書學謨爲文祭之曰居非仁里屢歷艱危生有剛腸致茲多中故不知君者

謂君心多厚防事疑匿怨沈沈而處若抱孤憤于世者常不能忍人所易忍而知君者謂君有難必排有窮必恤子子而行意氣之所憑決亦能爲人之所不肯爲其生平大畧可見子象賢徐學謨送龐子儀掌滁陽爲惜明經早翻嫌拜爵遲官仍鄉士使席白里門移開國英雄在環滁山水宜公車還有待未可厭卑棲

案應鳳曾祖邃祖琨父錦世居黃渡龐氏家乘詳細可攷無遷居安亭之說惟邑志科貢表注居安亭陳樹德作安亭志列入人物傳孫之堂安亭江雜事詩亦沿其誤皆由應鳳墓在安亭遂疑其爲土著耳今攷安亭志本傳舛錯者有二父錦名字不詳但稱怡琴翁殊失傳例一也兄應龍字子神改作子羽二也應鳳墓在晨字圩菩提寺北章涇上乃載在河四圖荒字圩二也象賢子登案登庸俱無後而其兄弟之裔今居卜家灣異日重修邑志當更正里居庶無傳疑也

龐淳字弱甫崇禎時諸生謹守禮度容止端正讀書至老不倦教二子有方令習揖讓稍戾于法甚至笞撻人解之答曰人未有不學文而行能立者况在教弟子乎從子瀚字凌如號容庵廩膳生有文譽

## 黃渡鎮志

### 卷六

五十六

朱仲堅名失攷崇禎末諸生人 國朝授徒餬口誠厚整慤以學行爲人推貧無立錫同學金彩以其田假名仲堅分立儒戶 國初沿明舊例進士戶田二千四百畝舉人戶田一千三百畝編立實號生員戶田一百七十畝編立歸號有司例不徵比由是因循不完者多 順治十七年入逋糧案與彩同削籍仲堅絕不介意年七十卒遺櫬破屋中故舊贖金以葬方出戶而屋梁折有神燈導至丙舍始滅衆以爲異

附錄部追奏銷兩案 順治十四年 詔赦八九年錢糧十五年復赦十年十一年錢糧戶部以嘉定紳衿自八年至十四年積欠一百三十萬有奇題請嚴追撫院張中元檄行至縣并聞題差滿官人人驚恐紳衿納糧者如市張撫至邑戶部官巴賴亦到清察官儒積逋攢造欠冊齎冊進京部議紳欠五百兩以上衿欠二百兩者解部處分新撫朱國治蒞任委兵道王紀到縣收紳衿欠百兩以上者一百七十餘人爲頭批閉于尊經閣諭令十日內完清當求解免一時破家蕩產甚有鬻子女者遂將紳衿封鎖解撫幸兵道仁慈設法救解分爲三等全完者羈圓妙觀承天寺完半者寄舖全欠者監禁又勸全完者義代衆欠完納至秋完清同求解免解撫准題免俱繫西察院候 旨旋盡釋放

十七年冬巡撫朱國治題爲年終奏銷之例將蘇松常鎮四府并溧陽一縣抗糧不完紳衿

造册題參奉 旨照例嚴加議處四府一縣紳衿一萬三千三百餘人俱被黜革本年錢糧欠及分釐者亦不免嘉定通庠止存三人時學道胡在恪按臨歲考一復丁艱學博以與試數少請文宗憮然久之曰一夔足矣何況二生竟以二生進考而優其等其未完紳衿拘入舖解道羈管候撫咨解十二月起解一千二百餘人康熙元年新撫韓世琦寬議奏銷一案奉 旨俱釋還其欠後全完者但未解京亦不開復

國朝

顧荃字香王初名人蘭自少慕晉魏人風致落拓縱酒暇則誦讀爲樂通經善詞賦嘗作傳經詠五章受知于慕方伯天顏又入柳郡承幕終不屑意而歸僦居南鎮之轎子彎家赤貧時絕食困童子試鬱鬱不得志卒以病心歿詩律典勁與浦鷗范超范逸有黃谿四布衣之稱逸最重荃才藻歿後或齒及逸必動容津誦中年娶舟人女爲婦有子二仍以篙師餬口汪存夜謂文人薄命莫此爲甚

汪价曰香王善詩古文詞尤長于賦所製時藝微有雲霧色不逮也家貧至無壁可立學減食法一日一舉火至三日三日得一飽餓而讀讀而不知其餓室人謫之鄉里咸笑之性介

黃渡鎮志

卷六

五十七

特落落不能就館穀不能突梯貴人之門獨與三儂老人汪价善時過半舫讀架上書出所爲文相質求示以古文真訣至日哺不能去凡十應童子試府縣輒冠軍一見督學使即黜落以故年四十八不得青其衿丙午冬將盡閉戶守餓絕爨者四日因自求死飭家人勿告之人人有知之者饋之粟令家人自飯僵臥于地噤其口不飲不食餓十五日不死忽有人傳言府檄至于月朔日試童子矣荃聞之躍而起曰吾自分必死此債未償姑忍之于是復強飯苟活窮晝夜揣摩以期必售徒步走澄江應道試次日即案發所舉十五人皆勢家子荃名又落時正午日與其友同登黃山至絕頂大呼曰今日得從二閭大夫遊真死矣奮身投江其友急抱持之得不死載之歸病心三月而殂臨歿語其壻楊生曰今去五六年又讀書矣我復何恨苟有殯者以破琴遺書爲殉不然即以土埋我不須棺也嗚呼天下無不死人有所溺焉而死是爲可哀如石崇之死財梁冀之死權劉伶之死酒荀奉倩之死色李賀之死詩倪瓚之死潔徐渭之死妒沈承之死不第皆溺之尤者也今荃以不與童子科而死尙忍言哉尙忍言哉

范逸哭顧香王陰符一篋老堪哀李廣難封豈不才他日若逢招駿客憑將朽骨上燕臺

手寫情言別故知愴然便與世長辭十年作賦今如此一束遺書更託誰

范超字同叔先世由黎里徙居黃渡之范家橋善隸書篆刻兼通醫畫詩才秀雅曾和王文簡士正秋柳詩二十首流傳殆遍過江人士羣以范秋柳呼之諸進士嗣郢引爲忘年交入國學應京兆試爲韓慕廬徐健庵兩先生賞識而卒無遇合故自以布衣稱爲人牢落善飲風雅中不少質樸與名公卿往來詩酒之外絕無干謁以是見重于諸先達吳江顧有孝輯百家詩鈔超詩與選二百餘首沈文愨德潛袁太史枚錄其尤者入 國朝詩別裁及隨園詩話由其氣體高妙得風人之正故月旦同詞云康熙丙子春以中酒暴卒年六十二

徐杏輔寄范同叔年來飄泊甚無計破愁城親老微名重家貧故土輕敝裘客子况青眼故人情何日重聯袂平生細細傾

潘肇振乙未春日憶范同叔誰吟好句向黃昏二月春寒早閉門欲弔故人何處是梅花零落是詩魂 山風吹落繡毬花有客貪吟到日斜春老年年猶自惜思君幾度不還家

王昶曰同叔爲人和易灑落有招飲者欣然輒往酒半吟其所作撚鬚發響芳若無人人亦不以爲忤也

## 黃渡鎮志

### 卷六

五十八

姚熙字止敬號開周監生其先自休甯遷黃渡少負詩名崑山徐尚書乾學奇其才往從遊焉時吳江顧有孝招致江左名士分題鬪韻烏履交錯熙聞之喜甚扁舟獨訪一見傾倒留數十日而別人問之曰此真齋菜孟嘗君也年末三十卒有孝採其集中諸作入百家詩鈔

范逸贈姚大止敬襄陽龐公今隱者雅量醇泊微言存廿年絳帳開講席與子先後爲及門舍處困窮漸潦倒秋風吹鬢容顏老終軍年少非常才玉樹臨風何皎皎去年挾策干清時白雪調古無人知博風勁翮竟遭鍛摩挲錦囊還自奇今年歸來臥林樾散髮長歌弄明月手持獨繙擊巨鰲自視三山思溟渤碧雲悠悠清江濱垂楊拂地桃花春一時投契多幽人况復與我平生親宵來雄談絕慨忼片語傾心如在掌我有一斗花閒釀澆子魄礪令神王男兒有才甯久藏直須努力青雲上

吳廷選初名斐字彥倫號拓庵祖世瑜籍休甯自徐州遷黃渡避仇復歸徐州父啓昌仍居黃渡家頗饒以无妄構訟蕩其有廷選不事生產工書耽吟所居皆饒花竹日與逸士相往還詩有友龍集客吳門歿于寓舍稿本散佚子觀光字達先號受齋諸生

吳桓嘉定志以友龍爲廷選名以達爲觀光名皆誤

范逸送吳拓庵歸白岳渡口垂楊江上邨白雲千載護衡門困窮敢恨時人棄用拙猶知我

道尊病後世緣都已盡老來耆舊幾能存憐君復作還山計別思悠悠那可論

兩家楊柳對江濱君止徂飢我更貧白髮放歌愁裏月青春遊戲夢中身萬山遙指鄉關路  
千里難忘雲水鄰總角定交今老矣不堪離思又重新

夏時中字允其號萍鄉諸生幼服賈弱冠乃究心制義不假師傅自能得其要以例貢遊都下  
失意于貴人之門蹭蹬南歸作一洗園詩百首借物言志詠不倒翁云未肯折腰高士志居然  
強項古人風詠草人云位若列朝將指佞臣猶在野敢論公其不可一世之概流露于楮墨間  
同里范逸爲賦蛾眉詩寄之以道時中之才不遇時云

張安輿字基士號式軒諸生工書能詩所居有環翠軒幽致逼真沈芑周曾豐館其家賓主唱  
酬自得時張氏羣從以資雄于里而安輿能超然物外獨寄情于林泉花木之勝時論頗賢之  
杜緯武字學海愛才好士築會川草堂于陸皎浦時海上姜墨圃桂以畫菜播名緯武招致之  
筆花墨雨情文浹甚乾隆丙寅姜自浙西歸復主其家緯武爲集里中朋輩結詩社以久羈之  
同社者爲沈雄萬之英戴最年焯吳汝蕃衍慶金秩如德音姚心若葵金崙發潤玉哀其所作  
爲草堂唱和集

黃渡鎮志

卷六

五十九

戴焯字最年別作醉奸諸生家笠園涇自號笠園居士制義細密南闈譽薦不售秦殿撰大成  
聘訓諸子又館葉運使昱家五載遠近推爲賢師酷嗜種菊秋風蕭瑟吟屐滿戶

章盛業原名懷道字懋功號谷香童時應縣試第一入國學三試北闈鄭公養田力薦仍落乃  
棄儒爲吏選山西左雲縣巡檢緣事褫職乾隆三十六年恭與祝 釐蒙 恩開復調補四川  
中江縣巡檢金教授襄稱其詩長于鬪捷之作奉委修晉省邊城得古錢數百枚有春暉堂收  
藏古泉譜官中江遍搨蜀中唐宋石刻年五十九卒于官

章駿業懷谷香大兄蒼茫北望隴雲深旅客魂銷入暮碁九日黃花空壓帽十年兄弟未同  
衾最憐易水舟中夢空憶南皮馬上吟尊酒茱萸今日醉遙知愁絕故園心

施洞春原名達字杏賓父偉業以家奴事株連爲仇家所陷匿跡客死于浙洞春痛父構險釁  
益厲志讀書奔走南北藉書畫爲薪水資數困童子試乾隆辛未補弟子員明年春登鄉薦素  
病咯血癸未會試闈中擬魁文已鏤版以論中微疵落之榜發房考以碎版出示名列第四一  
見大慟舊疾復作歿于滄州舟次

張欽銘次杏賓見懷原韻淞陽有奇士意趣頗幽長潑墨揮雲煙尺幅如琳瑯酒可飲一石

醉後能文章瓣香在何處嫡派追蘇黃

王不墓哭施杏賓霜風一夜吹寒角故人已化遼東鶴頻年下第殊可憐散盡黃金更彫索  
此時欲駐駐不得此時欲歸歸無色意氣平生貫斗牛蒼茫歧路心煩憂拊膺嘔血動盈斗  
一棺寂寞寄滄州滄州離家幾千里山蒼蒼兮水瀾瀾故舊交情日以疏骨肉哀痛何時已  
君家老奴念君恩收君骸骨招君魂魄有知兮莫來歸魂若來歸魂應悲噫吁噫昔日人情  
今已非

金煒曰杏賓所著詩文甚富兼畫花卉歿後子幼盡爲人移散求其稿不可得僅于破紙中  
搜得詩數首百歲已磨屏上字一編又失袖中詩致足慨也

汪時鳳字鳴歧號拙庵性開敏過目成誦弱歲餽于庠六十始登鄉薦發言砥行一誠不移惟  
以獎引後進爲己任嗜書至老不倦以冬夜擁被把卷火焚其帷中毒而歿子立誠字詹吉恩  
貢生德容藹如與從兄和孝有二汪先生之目和孝字全一增廣生

李榮春字燦庭號栗甫諸生好求古書晨鈔暝寫略無虛晷爲文樸茂有根柢詩多性靈諸雪  
堂廷槐張補庵崇儔咸以小友引接之坦懷質行與人交洞見肺腑足蹟所至朋輩偕來早年

黃渡鎮志

卷六

六十

髮半白未四十以病瘧卒知舊莫不流涕

章駿業寄李栗甫巢父一洗耳芳名驚千古高逸適其身與世亦何補抱膝發長吟吾愛吾  
栗甫詩書敦道誼爲善忘辛苦寒者絮其衣飢者無塵誦豐裕易新懷巧詐歸愚魯平生無  
縈紆所適妙規矩人希見其喜我未知其怒相對何恂恂清言亦縷縷譬彼久旱雲人共思  
其雨別離鄙吝生念之戰雙股冰雪梅花姿風度想眉宇何時更前席雅意揮松塵清遊啓  
慕思豈敢各旗鼓夜月照清尊輕煙憶舊圃歡情言笑深諧密瀉肺腑才華豈淹滯煙霞亦  
暫伍健翮摩蒼穹狂瀾迴砥柱嗟哉腹背羽車載奚足數逝將歸我廬來宿淞陽陽何爲白  
嶠雲引人日踽踽

王初桐字于陽初名元烈字耿仲一字無言號竹所又號巖壑山人祖璣字在庵博學傲世以  
諸生觸罪坐黜初桐自高涇移居卜家灣和易坦率與人接誦誦低語不立厓岸爲諸生十九  
年未嘗一入棘闈乾隆甲午入都例選山東齊河縣丞工倚聲情思綺旋喜作豔體 高廟東  
巡迎鑾曲本悉出其手旁稽泛覽爲博雅麗都之學王侍讀燕緒聘掌四庫全書校對事得盡  
窺武英殿書庫阮相國元視學山左引爲同調嘗錄其自束髮至宦成後所見書曰著姓氏卷

帙附已攷證爲羣書經眼錄六十卷長白依中丞江阿手書二十萬卷樓額贈之年七十致仕歸平生著書多至四十種爲卷六百三十二已刊行者一百八十卷壽九十二

張詩曰在庵性豪曠年雖艾而腸肥腦滿不能齷齪爲周容度遇不平事即奮袖起非意中人睥睨不交言以其少諧于世而擠之而下之石者不得免焉故其所作多悲憤之概而要其一種豪曠之氣任情率性自然之天機則眞如其人也

金。潘寶字蘊芳號鐵岡監生應舉不售隱于醫天才俊偉爲時推賞寓居膠城西與錢東垣陸珣諸仁煦交善晚偕吳軒翹輩葺橫塘斗閣爲焚修之所卒年六十八

金。鳳藻字尚儀號芝生教授襄長子嘉慶庚午舉人耿介有父風而孤潔過之詩文多作幽邃語綜覽百家過目輒沈思默識不得其蘊常以指甲切其額終日無一語所居南昀山莊四壁皆其手黏簽記存疑以待攷訂者同年沈學淵陸我嵩輩咸推爲畏友潘大令鎔聘修蕭縣志客遊江陰以病歸尋卒

金。煒字毓華號石史少爲高才生客山左主王某家放情聲色作惆悵詞百首膾炙人口繼乃斂才就實自都門歸里喜聚書搜羅前輩遺墨覃思著述旋以病瘵卒未竟所學

### 黃渡鎮志

#### 卷六

六十一

陸。曰壽字陰嘉號可泉又號未翁諸生性疏直讀書好瀏覽不爲章句之學多聞舊事喜談當時得失鄉國利病衝口而出衮衮不休家素羸博求古物嘗于嘉定卅勤堂張氏得徵君雲章所藏山研因以研文自號顏所居爲柳米齋貯之所著吳淞江雜事詩多載里中文獻宋太守如林重修松江志曰壽與爲搜探

張雲章山研銘并序余少時從吳市得此研上銳下廣長尺餘四圍不琢皆峻峭之形殆天生一峯也其下半有窪爲受水磨墨之地其旁有細書米芾二字其底有柳公權三字差大皆妙甚似親書而鑄之者非他摩手可到也又標其頂曰奇峯窪之上曰天然又有他題名余命工爲之匣而銘其蓋曰唐誠懸宋元章於維清歸我藏突作峯凹聚墨與我文蓄我德

洪。樸字鳳章號素田又號心園晚稱二知翁例補縣佐棄官不就選精畫牡丹外舅許國柄稱其得意之作爲與南田惲氏頡頏中年肆力爲詩深于擬古五言尤渾勁沈吟苦思至老彌篤旁及篆刻音律功皆精到有作輒自矜責貧無資釀錢以刊其所著

#### 耆德

明

龐。邃字孟信幼孤與兄廣能同甘苦卒致成立豪達過人多四方賢豪長者交天順三年邑令龍晉濟吳淞江飭邃分督工所自卜家渡至莊家涇奔走籌畫寢食俱廢上官倚以集事工竣令復委修滄瀆龍王廟事在范副使純記中家有敬軒在卜家灣因以自號

金。廷近字子忠號練齋往平令河曾孫篤于信義能緩急人里中數善士必及焉嘉靖中倭寇擾境居人蕩析鼠從廷近家雖被掠不惜餘資修復廢宇以收族中之無歸者授田食之與同豐約被澤者不自知身遭兵燹云子印

印。字國信號承齋敦篤謹慎好實行善事由黃渡至安亭石梁十一印捐資獨建兼精醫術療治多瘳志在濟人不計酬報萬歷中巡按王旌其廬曰善行天啓初邑令卓邁舉充鄉飲賓周廉字順夫一字養元盛德長厚隱居陳家巷延師課子而自業于農萬歷四十六年巡按御史吳繼升聞其行大書旌善二字獎之家有堂依梁爲架書臥于下睡夢中聞羣鷄飛鳴驚醒陡起架上鎌鋤耒耜應時齊壓人咸謂爲善免禍之徵晚舉鄉飲賓

陸。希疇字右濱諸生居陸家圩在鎮南六里爲北亭鄉之二十三保其地土墾汙下並困重賦希疇呈部申請減則盡破已產以供費其鄉至今以薄征蘇困國朝

戴。邦鳳字敬峰先世名德彝者爲建文朝御史燕王入德彝死義嫂項氏藏其二子于句曲山後由句曲匿黃渡遂家焉邦鳳性忼朗善治生以厚德稱重鄉鄙康熙庚戌歲饑里中會錢設

### 黃渡鎮志

### 卷六

六十二

粥于羅漢寺施米二百斛全活甚衆子世隆氣誼忼摯殊有父風

施。華祖字仲光自洞庭遷居黃渡康熙十一年疏濬吳淞憲司遴選華祖分段董役十九年歲饑設賑復襄其事知縣陸清獻公獎額曰功勤濟世

陸。肇宿字象明監生疏財好義每以餘資貸遠近之貧乏者約之曰子勿還我有需當自取之終不問焉夜戶不閉匪人感其義相戒曰此陸某門也我輩毋入先是貸金于嘉善高氏高久不索一日具子本償之高母善風鑑謂其子曰吾觀陸某必能爲善于鄉者焚其券可也及肇宿至高具以母命告竟不納歸謂子廷彬曰我當急爲高母布施凡里中善舉悉力奉行逾年而盡用其金且益之焉廷彬字采均

李瓊過陸象明齋即事評高月曰識賢良

原注余分符青邑曾以四字額公第

十載重登處士堂誼篤友朋逢管

鮑急周桑梓樂義皇園林紅葉霜天曉野菊秋風邨路香相對清齋談積愆人生何處不徜徉

洋

案瓊字玉樹長山人知青浦縣有慈惠名因缺庫帑罷官留寓十載遇赦乃歸此詩當是罷官後作也今從原本錄出青浦詩傳改結句七字

王原贈陸象明淳樸全漓智巧新予非先覺愧斯民千家萬戶鷄鳴起爲善如君有幾人

章。鵬程字扶九先世自青龍遷黃渡居北鎮八間樓平生剛直不阿待人以德家亦貧酷嗜施

與日以錢至市易米比歸則錢已散其半恒至日西方爨嘗于元旦以衣至質庫詢之則爲鄰人買棺也以子盛業貶贈登仕佐郎

章。大業字錫芳號雪舫監生鵬程弟之子闊達有大度業賣于崑山之天福莊置薄田二頃于旁佃田者有喪輒以己地勸之葬至不成熟減其額不惜也歲寬其租督勤惰平斗斛代償懸賦出里某于勢家奴感德者恆至相見泣下以歲入輸官課亟亟若不及邑宰吳桓蒞任初以筆楮數種致之爲先入賦者勸明年舉鄉飲辭不赴以寬恕教其家人稱忠厚章家云年四十餘連舉一子沾恩沾露見孝友傳

金乃銘  
填諱